





Assam nung tetsürtemi CM Sarma anema ken o benoktsüla: Gaurav Gogoi



Lok Sabha MP aser Assam Congress lennir Gaurav Gogoi (File photo)

**Guwahati, June 23, 2021**

**(Agencies):** Lok Sabha MP aser Assam Congress lennir Gaurav Gogoi-i Bobbarnü BJP-i aniba state sorkar aitsüogo.

Assam nung tetsürtemi Chief Minister Himanta Biswa Sarma anema ashikülakba ken o benoktsüla kechiyong micro-finance loans magien, ta Gaurav Gogoi-i ashi.

"Election magidang Assam CM-i tetsürtem dang micro-finance loans agientsü ta nangzüka liasü. Saka election tembangba sülen CM-i loan tera dang agientsü ta ashi" ta Gogoi-i metetdaksü.

"Assam nung tetsürtemi CM Himanta Biswa Sarma anema ashikülak ken o benoktsüla" ta paisa ashi.

Assam Chief Minister-i tanga party tem rasaktsüba mapa toktsür pa ket nung aliba mapatem nung temolung agütsüsüla, ta Gaurav Gogoi-isa metetdaksü.

"Assam nung BJP sorkari parnok syndicates ulushitsü meranger aser iba jagi parnoki ola madokba opposition ka aginür. Anungji, parnoki opposition party tem raksatsütsü meranger" ta paisa ashi.

Sorkar anema jembiba kija, journalist aser teloktem BJP-i amokmerener, ta paisa shisem.

CM Himanta Biswa Sarma-i Uttar Pradesh Chief Minister Yogi Adityanath tsüingsü sülen anidaker ta Gogoi-isa population control policy atema olen ka ashi.

"Kechiba Assam sorkari wildlife conservation policy indang mejembir? Kechiba population control policy indang dang jembir? Iba ajanga Assam CM Himanta Biswa Sarma-i UP CM Yogi Adityanath ajizütsü merangba sayur? ta Gaurav Gogoi-i metetdaksü.

Tripura nung "chakka jam" ayongzüka agir

**Agartala, June 23, 2021**

**(Agencies):** Truck kiburtemi lungkak aitba ajanga Assam-Tripura arrtsü anasa aliba Churaibari check post nung LPG truck 100 atema anendena lir.

Tripura CM Biplab Deb-i iba check post ajanga süiba truck gari ajak weight

measurement agitsü ta osang sangoktsüba anema parnoki "chakka jam" alir.

Tawa tu Tripura CM Biplab Deb-i Assam arrtsü anasa Churaibari check post semdang aser idangji ketdangsürtem dang state telungi maitdang gari ajak weight measurement agitsü

atema tetuyuba agüja liasü.

Tripura CM-i iba tetuyuba agütsüba ya truck kibur aser anishirtem jashidaksü aser parnoki mapang telatet makai "chakka jam" ayonga agir.

Parnoki Tripura CM Biplab Deb dang tetuyuba meyipa agitsü takhangba agütsür.

AAPSU-i BRO anema ken o benok; Tatok meshitsü akhanger

**Itanagar, June 23, 2021**

**(Agencies):** Kimin BRO (Border Roads Organization) chief engineer, Pramod Kumar-i Kimin ya Assam kübok dena lir ta sayuba anema All Arunachal Pradesh Students' Union (AAPSU)-i ken o ka benokogo.

Mongulbarnü AAPSU-i Itanagar Police Station nung FIR ka benok aser parnoki ashiba agi BRO-Kimin Chief Engineer-i iba jila Assam nung ta sayuba dang masü Bilgarh ta tenüing melen.

Iba ya Union defence minister Rajnath Singh adenba sentong ka nung atalokba liasü.

AAPSU-i BRO nem anogo 10 tsüingda state nung nüboritem dang tatok meshitsü atema mapang atakzüksüogo.

"Kimin BRO chief engineer-i inyakba mapa bushisüngdangtsüla aser onoki iba ya Arunachal Pradesh sorkar dangi abentsü" ta AAPSU president Hawa Bagang-i ashi.

"BRO-i tatok meshitsüla aser ibaji meinyakra AAPSU-isa state nung aliba GREF camps ajak nung lungkak aitsü. BRO-i tatok memeshira parnok state toktsür aotsüla" ta Bagang-i ashi.

"BRO-i kidangertem tsüingda mangatettep adokdaksütsü aser linük nung telemsa adoktsü atema iba mapa ya inyak" ta AAPSU general secretary Tobom Dai-i ashi.

BRO nung ochimashi mapa tulu inyakba ken o tem atema State aser Centre sorkartemi bushisüngdang asütsüla, ta AAPSU-i ashi.

Rajnath Singh-i adenba sentong tembangba sülen Arunachal Pradesh kübok Kimin ta sayuba signboard tem BRO-i nembangba agiena liasü.

June 18 nü Defence Minister Rajnath Singh-i Assam nung Border Roads Organisation (BRO)-i yangluba border roads 12 lapoktsütsü atema semdanga liasü.

Taoba MLA Yeshito Chishi ...

(TAPAK 2 NUNGI...)

Nenoki teti meima aliba kinungbu, tebu aser küden külemi inyaka arusang taoba MLA, Yeshito Chishi asüba angashia kanga sasar, ta NPCC tir, K. Therie-i Asür Yeshito Chishi kinungtsü Hutoli Chishi aser chirmur dangi shidi ka zülua liasü.

Asür Yeshito Chishi ya ajak nung ajak, linük meimba nübu ka, shiba linük aser state yimtenren indang kanga junga meteter aser yimten tebilemtsü koktettsü asoshi bendanga agütsür inyaka aru. Pai teti yaritsü molunga liasü aser tejangja nübu ka liasü, pai menürema lokti nung nübur

molung süngzüksü, ta K. Therie-i ashi.

Tanü pa asüba ajanga Naga nunger asosho lenir tajung ka aser anisüngzük akaba tebu ka asenok nungi pilaogo aser iba tawa memelentetsü. State ajunga atema pai shilem agiba mapatem tarutsü putuia teti bilemtetsü, ta ashi.

Kü den külemi NPCC nung ketdangsür aser züngsem ajungai asükhu lemsateper. Tulusang Tsüingremi na aser ner kinunger nem tesuneptsüba agüjang ta sarasademtsür, ta K. Therie-isa ashi.

ORIENTAL CHEMICAL WORKS  
CELEBRATING 92 YEARS OF ESTABLISHMENT  
RAIPUR, INDIA

RINGWORM, ECZEMA  
ASER TEMANG  
MESAKBA AGI  
TIMTEMER ASÜ?

HAO

Ringworm, Itches & Scabies nung tangsa süngzük

**ZALIM LOTION**  
For Ringworm and Itches  
जालिमलॉशन  
काप, खुजली की दवा

**ZALIM LOTION**  
*Fastest > Trusted > Tested*  
...By Generations

Medical store nungi aliang

Retailers may also buy online : [www.zalimlotion.in](http://www.zalimlotion.in) ✉ [zalimlotion1929@gmail.com](mailto:zalimlotion1929@gmail.com)



# TIR YIMYIM

## YIMOBILEM (EDITORIAL)

DIMAPUR YANGTEPNÜ, AAMI (JUNE) 24, 2021

### Ochi agi kin ka kumzüker

**M**apabo tilaka amai aser teinyaksangjia tereprangtsü nunga tilar ka dang saka pai inyakba mapaji ochi, teindang aser mapa shitak inyakba agi pei kin aser pei nübortem meteta aser memeteti tesama lendong tuluka nungi kumzüko. Paji Karbi Anglong, Assam nung Home guard, Borsing Bay lir. Pa ya asenok ama manger sangwa nung takar kumnüba meindang aser ochimashi nisung ka asübo, tan Hombar aonung to parnok mita anükdak, Dillai check gate nung takar kümer lila. Iba aonung ya 9:30 ako shi nung Imphal nungi Guwahati leni aoba bus ka nung ozüng agi memelaba mozü sen crore 12 jenjang gari anishisang jagi gari engine anasa jungjunga aleper miima bener ooya lia, Borsing Bay-i putet. Joko, koda mesüi oset sen paika jenjangji mepudaktsütsü mechi gari anishisang jagi Borsing-ji sen aika agi mesüzüksü merang saka pai manga aser ozüngi memelaba mozü den mozü shibelenertemji apu. Ano, tajung kaji iba ochi mapa inyakba osangji angashia, Assam police nung tulutiba, Director General of Police, Bhasjyoti Mahantai Borsing nemji tepela aser tenüngsang sempet sen lakh ka agütsüogo. Atangji, sen tsütsüji bilemdangra, Borsingji kanga akoksar amato asenokibo bilemtsü, kechiyong mozü shibelenertem jagibo pa nem, ashiko, sen crore junga agütsüdi tepu ta shia alitsü. Ajisüaka, Borsing asoshi senji masü saka kechi mapa inyakdir inyakaka ochishia indangindanga inyaksüla aser pa yangku nung semer par kidangi aoba senji ochishia aaba sen asütsüla. Iba mulungsentsüji koda temerük aser iba nisungji koda akhüm taket, shitakba pei lima tsükchir nungi kumzüksü asoshi taküm bendanga agüja inyaksangji pa lir. Pa amaji, Assam nung Home guard aser police ajaki inyak nungbo Assam dang masü saka India nung nisung taküm aika machimajemsü chia ajemba timtem takoksa nungi kumzükla. Borsing Bay temulungsentsü aser pai inyakba mapaji kodang asenok Nagaland nung alirtem den medemdangdir, asenokbo pa denjibo atishiteptsüla masü. Ashiko, asenokibo paji tekolok mait, shisa maka, matumalem, sen crore ta masüyonga lakh ter metsüka danga meshir odaktsüdi to, kechi balaka ta pajiang menüja bilema alitsüa akok, kechiyong asenok asoshibo ochimashi agi aser sübokrem agiba agi bendenba rongsenjiang shitakba amato jangratema bilemer. Aji oda, asenok aliba ki aser anogo shia asen mener jajaba gari aser asen chiyongba chiyongtsü teimbaka ochimashi mesüra sübokrem ajanga aruba rongsen aser chiyongtsütem lir. Tanga mapang nung atalokbatembo yutsür, tang ama tim mapatema sadema meinyaktetba mapang nung asen lima nungbo yi ajemertema shitak talubo ngua ajemer aser mozü achirtema shitak ngua achir. Ibaji tesüngmangtsüka lir. Kodang asen lima nung ozüngi memelaba mapatem sademsadema inyaktetba mapatem ya bilemdangdir, Assam nung ozüng raksaba mapa anema ochishia inyaker Borsing nem DGP-bai pa mapa tajung reprangteta senpet sen lakh ka agütsü süra asen lima nungbo jet ta meyiper, tang ama mokdangba mapang nunga dena Nagaland-i yi aser ozüngi memelaba mozü bener arutetba nisungtemji bushia senpet agütsüang asenok asoshibo tapetba asütsü südi ta bilemer. Asenok Nagaland yabo ozüng raksaba mapa anema inyakba nung masü saka ozüng raksaba mapatem nung toktepeba lima ka amato kumdagi. Shibai mapa meranga inyaker ta masü mesüra shibaibo ochishia aser indangdanga pei lima aser nübortem tenzüker ta masü saka shibaibo mapang tatsütiba nung mapa meinyaki kanga takar kumtetter ta asüba sentong nung tokteper amato asenok ajak toktepdagi aser shitakba itemji dang konang nüngsanga angur aser parnokji asenoki lokti senden nung tatishitsü tajung agitsü atema tongti tesemdanger südaktsür. Aji oda, shibai Nagaland asoshi inyaker ta masü saka shibai Nagaland tenüng nung aruba sen teimba chitetter aser shibai teimba sarutetter ta asüba nung asenok ajak tetokteper kaka lir. Iba jagi Nagaland shiranger. Asenoki ochimashiba rongsen agi asen atema kiojen tajung yangluba agi Nagaland topur ajungtsü amai bilemer saka alima yabo ochi aser teindang mapa agidang topur ajunger. Atangji, kijibo tajung saka yimti yimdongbo majung, kimalen ozüng raksar onsara, nübortem rongnung tesünep mali, light junga marur, mozü kidang taneptsü mangur, tetsürtem pei temang yoka alir aser teburtem rakzükratema agi chiyonger, tetsübu agi yimti nung kecha mienyaktetter ta aliba lima aser yimtijji kechi sütsü? Tanü asen lima iba tia nungji lir. Asenoki asen kin ajungkettsü indangbo kanga jembir saka asen kin masü saka asen ajungkettsüang bilema ochimashi mapa ser nung ochishia inyaker ama inyakba ya asenoki inyaktetba tesüngmangtsü mapatem rongnung ka asütsü. Apijemtsü Shin 14:34 nungbo ashir, teindanger aser ochishirtemiang kin ka ajungkettsü. Pei lima ajungkettsü aser kumzüksü asoshi ochishia inyakba mapa ya tulur aser takari dang ta masü saka Borsing ama tilariang tuluba inyaktettsü. Ochi agi alima ajungkettsü tenzükbaji yamaji tilaka nungi tenzüker.

## OLEMSABANG

### AFRICAN SWINE FEVER TEKUMDANGTSÜ

#### African Swine Fever Ya Kechi?

African Swine Fever (ASF), ya azü yimtoka aoba (Haemorrhagic disease) tashitak ka lir. Iba tashitak ya asenoki metsüba ak mesüra arem pongzütem rongnung adoka menatepba aoba tashitak lir. Iba ajanga noklang nung noklang (100%) tasüba bener arutsür. Tashitak ya African swine fever virus (ASF) ajanga adokdaksür.

#### Koma Prokshia/Züina Aoer?

- # African swine fever agi shiranga aliba aktem aser anema aliba aktem külemi meyoktepa metsüba ajanga tashitak menateper.
- # Ak chiyongtsütem mekümdangi ak nem agütsüba ajanga tashitak adoktsü akok.
- # Ak mesüdang amshiba osettem koba iba virus ajanga menena lir, item osettem amshiba ajanga ASF tashitak menar.
- # Virus keta aliba meja-i (ticks) anguba (bite) ajanga menar.
- # ASF tashitak keta aliba aktem taküm mesüra ASF tashitak keta aliba ak shitem lepa ayokba ajanga ASF tashitak ya meta balala tonga züindaktsür.
- # ASF tashitak agi asüba ak junga marümba/meindokba ajanga menateper.
- # Jila aser yimtsüng nung ozüng takang melatetba aser mepenshiba ajanga tashitak aketba ak meta balala-i bener belenshiba ajanga iba tashitak prokshia aoer.
- # Ak talitak aser temeket junga merüka mayuba ajanga tashitak tali züiner.

Anogo Kwi Nu Nung Ak Dak Tashitak Lir Ta Metettsü?

Anogo 4-19 tashi nungo iba tashitak temaitsu ak nung adoka angutsü.

#### Iba Tashitak Ajanga Nisung Dak Timtem Lir Ma?

African Swine Fever ya nisung o shiruru tetsüngda belenshia züinba tashitak masü. Anungji ASF-i nisung dak timtem magütsür.

#### African Swine Fever-i Shirangba Temaitsütem Kechisa Lir?

- # Ak teküp merema aotsü
- # Temang metatsü
- # Tashi Meiti akümtsü
- # Temang telong nung bleeding asütsü (Internal Bleeding)
- # Chi mechiyongtsü
- # Menoktaktettsü
- # Mapang matongdang, ak techanu tepok nung süadoktsü
- # Saksüa tepok aotsü (Azü tena tepok aotsü akok)

#### African Swine Fever Anebaluyim

Tang tashi iba tashitak atema anebaluyim kecha mali. Tang tashi mozü (vaccine) kecha adoka mali. African swine fever tashitak temaitsütem ya common swine fever temaitsütem den mesüktepa lir asü nung, iba tashitak ana bendangtsü atema laboratory nung tendangtsü nungdaker. Tashitak tendangtsü asoshi laboratory-i bener yoktsütem-

1. Azü
2. Tepha
3. Tezüngjang
4. Tepokpok

#### African Swine Fever Koma Nokdangtettsü?

- # Ak farm nung shiruru kumzüksü tekümdangstütem junga bentshüla
- # Farm meketa arem pongzütem nungi kumzüksü atema fencing inoktsüla
- # Farm nung aktem tesem ka nungi ka mepelenshüla
- # Teyariteper aser taru taoertem farm nung mashi mesenzüdaktsütsüla. Nungdak mapang nung, parnok ajak junga merüktetter-ang farm telongi aitsüla.
- # Farm-i aيتدang, nübortem asoshi farm kikümbang nung tsüngsem merüktsü atema tzü nung mozü meyokteper ayutsüla.
- # Ak farm meja (ticks) nungi kumzüka ayutsüla.
- # ASF tashitak agi atongba aktem aser anema aliba aktem balala bendanga kisüng ayutsüla.
- # Mapang shitak nung tashitak puteta, kümdanga tepsetter jung junga arümtsüla.

Temettsü:-

Ak kar danga shirangba aser ASF temaitsü ngüra, tekaratiba nung anasatiba Veterinary Centre den tongteprateptsü ajungshir.

Contributed By : Department of Animal Husbandry & Veterinary Services, Mokochung

Translated By : Shri Imlipokim Pongener  
Assistant technology Manager, ATMA, Mokochung.

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazüngerü angateta agitsü mepishir**

## Iran nung ozüng tasenba kübok Khristan 3 anema ken o angadanger



Iran nung Islam yimsu toktsür Khristan yimsu agizüker asem- Milad Goodarzi, Amin Khaki aser Alireza Nourmohammadi nunger noksa nung angur.

**June 23, 2021:** Iran nung tawa yanglushiba ozüng tasen ka kübok Khristan aseme tamangba yimsü telok ka anema inyakogo, ta tai tonglokja ken o angadanger.

Khristan asem- Amin Khaki, Milad Goudarzi aser Alireza Nourmohammadi nunger ajak ya Islam yimsü toktsür Khristan yimsü agizükertem lir; tamasbo parnoki Islamic yimsüba anema jembu, ta parnok nem tai tonglokja liasü.

Taküm February ita nung Iran Parliament nung ozüng ka yanglushiba sülen taoba Tir, Hassan Rouhani-i sign süa ozüng tasenbaji agizüka liasü. "Islamic sharia (ozüng) anema shisaliok agütsüba mesüra osang probkaji ozüng alema lir, aser aibelenertem nem temerenshi tulu agütsüsu," ta ozüng tasenba nungji shia lir.

Iba ozüng kübok ketdangsertemi Evangelical movements aser Islam yimsü toktsür Khristan yimsü agizükertem anema inyaktsü.

Iba ozüng kübok aibelenertem küm 2 nungi küm 5 tashi tepuokdak ayutsü aser küm 15 tashi vote temeden agienba den külemi senchi achitsü.

Khristan yimsü agizüker asem ya Church of Iran nung züngsem lir, aser Hombarnü Iran kübok Karaj nung aliba okadak parnok anema ken o angadanger. Tongti judge-i par asem atema ken o jembitsür lawyer-i pa parnok atema lawyer ta register masü ta shia court-i arutsü memela.

Ajjsüaka Christian Solidarity Worldwide teloki ashiba agibo, lawyer-i anogo 10 jakdang inyakim ajak inyaker liasü. Ken o angadanger mapang nung judge-i Khristan asem dang, nenok atema ken o jembitsür mali, ta metetdakja liasü.

Taküm May ita nunga par asem jaoka parnok dang asüngdangyar liasü. Par aseme Islamic yimsüba anema jembuigo ta tai tongloktsüba sülen bail nung chiok, saka hopta shia police matsügdangi

arutsü tuyua liasü.

Iba ken o dak sendakba nung Arogo züngsem 17 danga asüngdangyaogo.

Tang tashi nungbo Iran ketdangsertemi, Khristan asem jagi linük security anema inyak, ta ashir saka judge temi ibaji tim mesüi amshia parnok anema ken o tuluba benoker.

CSW tentetsang aser Tir, Mervyn Thomas-i, "Ozüng yanglushibaji ajanga iba linük nungji minority tem ano taliba reshikangshitsü. Onoki Iran ketdangsertem dang Iran nunger nem meimchir temeden ajak agütsüsu atema iba ozüng aser ibala mesükba ozüngtem agentsü akhanger. Linük nung judiciary ajanga Khristantem densema minorities amokmerenba anentsü akhanger," ta metetdaksü.

Tawa Iran Tir election nung Ebrahim Raisi-i takok anguba sülen linük nung Khristantemi tarutsü tia atema shisabulua bilemba mapang ka nung Khristan asem anema ken o angadanger.

## Pakistan linük nung prangpong amer telok kati Tenla ki amak

**June 23, 2021:** Taoba ita Pakistan kübok Punjab Province nung prangpong amer Muslim nunger telok kati Tenla ki ka amakba mapang nung Khristan aika yirugogo, ta June 23, 2021 nü International Christian Concern (ICC)-i metetdaksü.

May 25, 2021 nü Muslim nunger pongu prangpong amer arua Harvest Arogo Tenla ki amak. Iba Arogo ya Punjab Province nung Khanewal district kübok 81-82/10R yimdak lir.

May 25 nikongdang 6:00 ako meta Muslim nunger telok ka arua Tenla ki kikümbang nung akoshi. Tenla ki mita repranger, Nadeem Masih-i shirnok aliar ta metetnua kishiji lapoktsüba sülen parnok pongui

tashiyim amshia Tenla ki compound telungi ai.

Parnoki anünglen injang aika khadok aser Nadeem dak azük. Parnokisa sarasademtsü atema Tenla kidang adenshia alir tetsür densema Khristan aika dak azük.

Nadeem, Binyameen Masih aser Rafaqat Masih nungerbo kanga mejungi yirua Khanewal nung aliba civil hospital-i anir ao.

Muslim nunger jagisa Tenla ki tongti kikümbang, kichiba aser furnitures raksatsü. Parnokisa Khristantem meyong motorbike ana raksatsü.

Harvest Arogoi iba tatalokbaji local police nem metetdaksü aser Sadar Khanewal Police Station nung First Information Report (FIR)

ka benok.

Muslim nunger pongu rongnung nisung asemo Sabir Butt, Muhammad Faisal aser Aqib Javed nunger lir ta jangjaogo saka tanünga nisung ana maitsübo mejangja.

Pakistan nung mapang shia Arogo aser Khristantem anema inyaker. Taküm April ita tatembanglen-a Muslim nungertemi ali atsünga agitsü nükjidong nung Khristan kibong tenet ki rongdokja liasü.

Meimchir temeden atema inyaker, Asif Munawar-i International Christian Concern (ICC) dang, Muslim nungertem jagi Khristan kibong ajak tenüng nung Khristan ka nem yimjung yangluba document ka nung kangshia sign südaksü, ta ashi.

## ANOGO ABEN TSÜNGREM DEN

### Tsüngremer taochi amshiba

*Nisung shiai sempet agizükba ama, aji agi Tsüngrem taochi jenti meyong ketdangpurtem tajung ama, nenok medemer o medemer na yaritepang.*

1 Peter 4:10

Tatembangji koda arutsü Peteri lemsatepba liasü. Khrista tabensa taküm ali, aser ajak asoshi asü. Shirnoki osangtajungji angashia lir parnok taküm junga aser temenen memenai alitsüba dang masü saka Khrista tanaben arudang tatem bendangba nungi kümzüksü. Tang pai tamanger taküm koda junga alitsü iba indang ashir. Mapa ajak Khrista ajanga Tsüngrem sentsüwangshidaksütsü asoshi kari o jembira, pai Tsüngrem otem ama jembiang, kari tenzükra Tsüngremi agütsüba tashi ama inyakang. Idangji pai sempettem agizükba indang jembu. Pauli aiben tanela sempettem indang jembu (Rom 12, 1 Kor. 12), aser shibai Khrista agizüka lir pai pei agizükba sempetji jangjaa amshitsü ashi.

Tanü asenoka Khristan ka ama, Tsüngrem sempet balaka agizüka lir. Kodang asenoki temenen nangzuka amangdir idangjisa Tanela Temeshi dang agizüker masü, saka Tsüngrem sempet temeja agizüker. Asenok nisung shia balala ama Tsüngremi nisung shia nem sempet balala temeja yangluja kar. Asenoki kati ka tenzüksüla. Khristan taküm nung ibaji taküm lidaksüba teraji lir. Tangar nungdak nung yaritsüba, tamanger aser mamanger ajak. Kodang asenoki iba sempet Tsüngremi bilemba ama amshidir, asenok ketdangsür tajung ka ama kuli sayur, Tsüngrem taochi tangar dang sayuba jagi Pa taochi amshir tajung ka ta sayur. Asenoki tangar tenzükba nung iba taochi anogo shia amshitsüla.

Tsüngrem, kü nem sempet agütsüba asoshi Ne tenüng asanger. Ni iba sempet shisa kaa amshitsü yariang. Amen.

## ICC-i Tamil Nadu nung pastor 31 nem teyari agütsü



**June 23, 2021:** Tang India prokba mapang nung Pastor linük nung coronavirus wara Babu aser par kibong senotsü ajanga Arogotem nung Tenla agi kanga anünga timtema liasü. junga maruba ajanga tenzük ICC den jembidang pastor kibongtem aika kanga timtema Babu-i, "Iba wara ajanga onok aliba mapang nung International kanga mejungi kongshi. Onok ket nung aliba chiyungtsü kanga nung pastor kibong aika nem anga-a chiyunga liasü. Wara teyari agütsüogo.

Tamil Nadu nung Pastor Mani Babu-i, "ICC-i chiyungtsü agütsüba ajanga onoki shisabulua nungi kümzükogo," ta metetdaksü.

June 12, 2021 nü Pastor Babu densema Tamil Nadu nung pastor 31 nem ICC-i emergency relief kübok chiyungtsü tapu balala agüja liasü.

Pastor Babu ya Tamil Nadu state nung aremlen aliba tesemtem nung Arogo tasen tenzüksür ka lir. Tang coronavirus wara tanaben

kidangi oa sarasademba den külemi ter shilem bendena aruogo. Onoki police tsügdang kanga mimshia senzü, kechiyong onok aliba tesem nung lockdown ozüng tesashi benoka lir," ta metetdaksü.

ICC-i Pastor Babu densema pastor 31 kibong nem jang, mejang, maida aser totzü densema nungdakba teyari balala agütsüogo.

Pastor kibongtem ita kabosa peritsüsa chiyungtsü agütsüogo, ta ICC-i metetdaksü.

**OLONG PAITEP # 5854**

1			2		3		4		5	
6		7								
					8					
9				10						
						11				
			12							13
	14								15	
					16					
			17							
									18	
19										

<b>TIPILEN</b>	<b>LANGTSÜNGLEN</b>
2. Teburtemi tejak nung awaba - (8)	1. Temejangdak - (6)
6. T _ _ _ em - (3)	3. Nisung ka mapa inyaksü nübo- (4)
8. Tzük ayudak - (3)	4. Azüntsü asoshi mejemba - (6)
9. Nüngdakba dang timba - (6)	5. Tesangwa agütsüba - (5)
11. Züina ao - (4)	7. Tila masü - (4)
12. Yangi tzü angur - (5)	10. Tebenjem tetsür chanu - (4)
14. Tangar dang nungi tali - (4)	11. Tekolak nung inok - (4)
16. Senyong masü - (6)	12. Tetsüngda - (6)
17. Oadokdi - (3)	13. Tangar inyakba ka inyak - (6)
18. Tzü tarok - (3)	14. Tim masü ta ashi - (5)
19. Yimtaklir aikati iba ya ki den külemi yanglusemer - (8)	15. Asalendong - (4)
	16. Tanü dangtsü - (4)

**OLONG PAITEP # 5853 TELANGZÜBA**

<b>TIPILEN :</b>	<b>LANGTSÜNGLEN :</b>
1. Telok, 4. Aluru, 6. Ozüng, 8. Emk,	1. Tenükjang, 2. Luden, 3. Kiochtsü,
9. Kin, 10. Teti, 12. Süir, 13. Jen,	5. Lenti, 7. Tajangzük, 11. Teronem,
14. Ola, 16. Talak, 17. Mazük.	12. Sempa, 13. Jahaz.

**YABO MELENSHIDI NI**

**ALOKBAI WATSAPP AMSHIRTEM AJAK DANG TEKÜMDANGTSÜ KAR METETDAKTSÜR :**

*Ohooooo! Watsapp amshirtem ajaki ya tenoktenoka angang nih.....*


1. Watsapp group tenzükba ya information atema, yimtsür yimer nungdak metetpelatsü, takok osang lira tenungsang agütsütsü, yabosa ozü group atema tongtipang ah ta, mesüra na kangasa temoatsü anguba lira ajibo lemsateptsü, ajibo tim, saka nü dangi aruba ajak group dangi yokbaji, nisung ajakbo na amajisa masü, anungji iba yimya ji melenshiang.
2. Koba group sudir suaka, admn. lir, parnok dak alaka, nai anepdang aonung shia, Good morning, Good night yokba yimya melenshiang.
3. Tamakitsü watsapp ajanga aruba ajak group nung teyok. Nai kangasa yoknura, nur medemer dangi yokang. Tongtipangsa, yimtsür yimer group yabo tulur tilar, taintem ajak tena ali nung, teintet rogo, yimtsü yimbu akümtsübudi.
4. pur medemer suaka, na amaji anogo peyong mobile amer kazür masüji, nai yokbaji delete sur mesüpur, anungji iba yimyaji ah metetdangma.
5. Tangari yoker aliba repeat teyok, tetenzü, naibo yoker, tangari yokba naibo merepranger ta angatetdaktsür. Tang atema aji danga melenshitetra, tangari na mesempatsü. Alobkai teyimla tulu nung aji melenshitsürah noh.....

~ Aienla Ao

**AO OSHI ANGAZÜKDAK:**  
**TANÜ ANGAZÜKTSÜBA OJANG**

**Kara**  
(v) yakta (fast)  
\* Ni mapai kanga **kara** aoer.

**Kara**  
(v) lirabang ( if available)  
\* Nür sen **kara** tenla agüjang.



**Tepela Tasoba Anogo**

Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimiyim bureau tem nung agüjang.



1. Tenüng : .....
2. Tasoba anogo: .....
3. Küm : ..... 4. Class : .....
5. School : .....
6. Talidak : .....
7. Salem osang : .....

**TANÜBO NAI LANGZÜANG**

**Q. 44buba GST Council nung, Covid Vaccine indang GST % ji kwika?**

**A.5                      B.7                      C.0                      D.1**

————— (Taruba adok nung onoki langzüsü)

**YASHI ADOK TELANGZÜBA : 2014**

SUDOKU # 5895					TELANGZÜBA # 5894												
			4	8	6	2		9	1	4	9	6	5	7	2	8	3
9		6				3			2	5	6	3	8	4	7	9	1
		8		3	5	7	6		3	7	8	2	1	9	6	5	4
2	3		6	9		4			4	6	1	9	2	5	8	3	7
7	8				3				5	3	7	4	6	8	9	1	2
			5	4	7	8	2	3	8	9	2	7	3	1	5	4	6
5		3					7	8	7	8	4	1	9	2	3	6	5
1		2	8		4			5	9	2	3	5	4	6	1	7	8
		9	3	5			4		6	1	5	8	7	3	4	2	9

**OJANG LUTEP # 5439**

TEDEMMEERM :

MPIBJEA :

GAIMAN :

EIP :

EMBBILA :

NGDA :

AKBAINYJIA :

ASAKANG :

SUASHTAJIT :

URAU :

**OJANG LUTEP TELANGZÜBA # 5438**

**TANGARI BILEMBA MAPAREN TAJUNGBA ASÜYONGA PEII BILEMBA DANG INYAKDOKER ALIR**

**TAN HOPTA ATEMA - KOMA SÜLA ?**

**Q. Food & Civil Supply department nungi Relief jang ya magütsü anen nunga koma süla ?**

Olong 20 shi nung June 25, 2021 tashi nung iba telangzüba ya onok dangi (e-mail - tiryimyim@gmail.com) :  
(SMS - 9856121232 / 9436072422) : (WhatsApp - 7005723372 / 8729995804) : (tiryimyim.in) ajanga yokang. Telangzubatemi taruba Honibarnü adoktsütsü.



June 23, 2021 nü Ranchi nung Saraswati Shishu Vidya Mandir School- vaccination centre nung nisungtem coronavirus vaccine agitsü atema nokdaka aliba noksa nung angur.

### India nung Covid case million 30 jungogo aser 3,90,600 süogo

**New Delhi, Aami/June 23 (Agencies):** Yaküm küm tetenzüklen India linük nung coronavirus wara prok tenzükba sülen nungi tang tashi nung linük nung nisung million 30 (crore 3) tema dak coronavirus tashidak putetogo; alima nung nisung crore 3 tema dak iba tashidak putetba linük anaji US aser India na dang lir.

India nung coronavirus case crore 2 ajungba sülen anogo 50 kija nung crore asem ajunger. Taküm May 3 nü India nung coronavirus case crore 2 ajung, iba sülen anogo 14 nung lakh 50 bendenlok aser tesüsa anogo 36 nung (May 17 nungi June 22)

ano lakh 50 bendenlokogo. Tesüiba hopta ishika tsüingda India nung coronavirus case kanga ajema kümdar, talisa June 15-21 tashi nung coronavirus positive putetba shilem 5 den tajemba kümogo, aser tang India nung district ishika nung ang coronavirus kanga puteter.

India nung coronavirus tashidak agi shiranger 3,90,600 süogo aser iba nungjagi nisung 2,33,402 (shilem 63) bo taküm March 1 nungi coronavirus wara tanaben prokba mapang nung asü.

Tang tashi nung India nung nisung 30,027,364 dak coronavirus putetogo aser US

nung crore 3.44 dak iba tashidak puteta lir.

Tesüiba ghonda 24 tsüingda India nung ano nisung 50,848 dak coronavirus putetogo aser iba tashidak agi shiranger 19,327 anepba sülen tang teshirangdakpur 6,43,194 dang kümogo, ta Bodhbarnep Union Health Ministry-i metetdaksü.

Tesüiba ghonda 24 tsüingda India nung coronavirus vaccine dose lakh 88.09 agütsüogo. Taküm küm tatembanglen tashi nung linük nung tain ajak nem vaccine agütsütsü sorkar nukjidong lir, aser ibaji ataloktsü atema anogo shia vaccine dose lakh 97 agütsütsüla.

### Measles vaccine ajanga tanurtem Covid nungi kümzüksüa akok

**New Delhi, June 23 (Agencies):** India nung coronavirus wave tasembuba mapang nung tanurtem mejungi kongshitsüa akok, ta bilema state aikati renemshiba mapang research agirtemi iba wara nokdangtsü atema lenla ajak nungi asandangdar.

Study tasen ka ajanga ashiba agi, Measles Containing Vaccines (MCVs) ya India nung routine immunisation programme nung lir, aser iba vaccine ya ajanga tanurtem SARS-CoV-2 virus nungi shilem 87.5 agi kümzüksü.

BJ Medical College, Pune nung research agirtemi, measles indang vaccine ajanga tanurtem coronavirus nungi shilem 87.5 agi kümzüksüa akok, ta metetdaksü. Kasa study ajangasa, arrshi küm 18 ser tekübok tanurtem measles

vaccine magirtem dang nungibo vaccine agir tanurtem dak coronavirus tashidak temaitsü tajemba liasü, ta bushitet.

Iba study ya arrshi küm 1-17 tsüingda tanur 548 dak agia liasü, aser item tanurtem rongnung tamalen coronavirus puteta alir aser kodanga meputetba tanurtem densema lir.

Iba study ya Department of Community Medicine nungi BJ medical college researchers aser paediatrician, Dr Nilesh Gujar nungeri agi aser Serum Institute of India (SII)-i senotsü agi yaria liasü. Iba study ya jungjunga jangjatsü atema clinical trials agitsü nungdaker.

Iba study ya jungjunga agia kuli tejangja angu nungbo coronavirus wave tasembuba mapang nung tanurtem wara nungi kümzüksü.

### Prashant Kishor-i NCP tongti, Sharad Pawar den senden amen

**New Delhi, June 23 (Agencies):** Yimtenren aser election asalentong yanglur mongin, Prashant Kishor-i Bodhbarnü-a Delhi nung Nationalist Congress Party (NCP) tongti, Sharad Pawar ajurua senden menogo.

Hopta ana tsüingda pai tang agi tasembububa Pawar den senden amener.

Mongolbarnü Pawar leniba nung Opposition party tem senden mena liasü.

Tan hopta tetenzüklen, Hombarnüa Kishor-i Pawar den senden mena liasü. Taruba Lok Sabha election nung BJP tamakok ngudaktsütsü atema opposition party tem longjemer teloktep ka yanglutsü atema NCP-i inyakdar.

Tawa Tamil Nadu aser West Bengal assembly elections nung Kishor-i DMK aser Trinamool Congress na atema election asalentong yangluja party anapronglai takok angu.

Mongolbarnü Pawar-i ayongzükba senden nung Trinamool Congress, Samajwadi Party, Aam Aadmi Party aser Rashtriya Lok Dal densema opposition party ti nungi lenirtem aden.

Ajisüaka iba senden nungji shilem agia adenertemi, senden nungji yimtenren dak sendakba onük mejembi, ta metetdaksü.

Mongolbarnüsa Pawar leniba nung NCP national executive senden amen aser senden nung taruba Lok Sabha election aser tang linük

yimtenren tensa atema jembi. Mongolbarnü Pawar'er kidang ayongzükba Opposition party lenirtem senden nung adenertem rongnung National Conference lenir, Omar Abdullah, Samajwadi Party nungi Ghanshyam Tiwari, RLD Tir Jayant Chaudhary, AAP lenir Sushil Gupta, CPI nungi Binoy Viswam, CPI-M nungi Nilotpal Basu aser TMC tatong Tir, Yashwant Sinha nunger liasü.

Senden nungjisa taoba mapang Congress lenir Sanjay Jha, taoba mapang Janata Dal-United (JD-U) lenir, Pavan Verma, taoba mapang ambassador KC Singh aser Justice (ret'd) AP Shah nungera shilem agia aden.



New Delhi, June 23, 2021: Tang Punjab nung Congress party telung nung mangatettep adoka lia Bodhbarnü New Delhi nung Congress MP, Pratap Singh Bajwa-i party lenir Rahul Gandhi ajuruba sülen osangbenertem den jembidang tangokba noksa nung angur.

### Ramdev-i SC dang pa anema benokba ken otem Delhi-i belentsü mepishi

**New Delhi, June 23 (Agencies):** Bodhbarnü Yoga tesayur, Baba Ramdev-i Supreme Court dang pa anema benokba FIRs ajak Delhi-i belentsü mepishiogo.

Pai allopathy aser allopathy doctor tem anema jembiba atema pa anema ken o aika benoka lir.

Osang angazükba agi, Ramdev-isa Supreme Court dang Indian Medical Association (Patna aser Raipur units)-i pa anema ken otem benokba nung ajemdaker pa anema inyaktsü aliba nungi kümzükang, ta mepishiogo.

Taoba ita Ramdev-i, allopathy ya "shisa maka science" lir aser Drugs Controller General of India-i agizükba remdesivir aser faviflu densema mozü balalai coronavirus agi shirangertem treatment nung meyari, ta aitsüba sülen mangatettep tulu adoka liasü.

Ramdev-i, coronavirus atema amshiba mozü kar tashishitsü keta lir, aser coronavirus agi shirangertem nem allopathic mozü agütsüba agi nisung lakh aika süogo, ta jembia liasü.

Ramdev-i item o jembiba

video ji social media nung prokshiba sülen Indian Medical Association-i pa jembiba o anema ola adok.

Linük tesem ajaklen doctor temi Ramdev dang tatok meshitsü takhangba agütsü aser Union health minister Harsh Vardhan-ia Ramdev-i jembiba oji aija liasü.

Taoba ita Ramdev-i allopathy aser allopathic doctor tem tenüng menükja jembiba atema IMA-i pa anema sen crore 1,000 indang defamation notice agütsü.

IMA-i, Ramdev-i IPC Arrla 499 kübok ozüing alema inyakogo, ta shia pa dang anogo 15 tsüingda tatok meshitsüla, aser pai tatok memeshira IMA züngsem shia sen lakh 50- sen crore 1,000 temenok meshitsü, ta metetdakja liasü.

IMA-isa Ramdev dang video clip ka ajanga pai jembibaji tai, ta pasasa nangzükba social media platforms nung prokshitsüla, ta takhangba agütsüba den külemi pa dang, pai social media nung coronavirus atema mozü ta shia "Coronil kit" advertise asüba ajak agentsüla, mesüra pa anema ken o benoktsü, ta metetdakja liasü.



New Delhi, June 23, 2021: Sanjay Gandhi sür küm 41 abensaba anogomong nung BJP MPs-Maneka Gandhi aser Varun Gandhi nati asür indang memorial semdanga akhüm agütsüba noksa nung angur.

### Burkina Faso nung police 11 tepset, pezü samar bushir

**Yirgou, Aami/June 23 (Agencies):** Burkina Faso north tsütsü rara agi sünger aliba tesem nung police unit ka dak mita atar amakba lendong nung parnok 11 asü aser pezü samar bushir, ta sorkari ashi. Mongulbarnü osang ka sangdongba nung Security Minister Ousseini Compaore-i ashiba agi, tawa azüdokshi agi kongshir aliba Yirgou jila nung police tem ya teyari agütsütsü aoba mapang lendong ya ajuru. "Yashi nungi mitkartem den lungjemer samar alirtem bushiba operation ka tenzüka lir," ta Compaore-isa ashi. Tang tashi iba lendong agütsüba asoshi kibur kuma sangdongba shinga mali. 2015 küm nungi tenzüka Burkina Faso nung al-Qaeda aser ISIL (ISIS) den sendaktepa aliba telungpur telok temi mapang shia lendong tulu agüja aruba den raraba nung timtem ajurur. Iba ama lendong agütsüba nung nisung tajemba agi 1,400 süogo, koba linük north tsütsü

### Nepal indang Supreme Court-i cabinet timba anentsü

**Kathmandu, Aami/June 23 (Agencies):** Tawa shimtetba minister 20 tashi Nepal indang Supreme Court ajanga anentsüba ajanga mangatetep agi sünga aliba communist Ato Kilonser K.P. Sharma Oli tekolak tali atsütsüsa akumer, kechiaser khen atema shimtetba ato kilonser kati cabinet nübu iba ama shimba atema okadak ken o benoka obendang magütsü lir. "Ibai tang atema agütsüba lir, court ajanga tatembangba obendang ya khen lir agütsütsü," ta court nung ketdangsür Bhadrakali Pokharel-i Bodhbarnü osangbener dang ashi. Iba Himalaya linük nungya coronavirus wave tanabuba maziükteti tim atemba mapang ka nung yimtenren tsütsü rongrong adoka Communist Party of Nepal (UML) telungzük nung arishitepba ajanga May ita vote of confidence agitsüsa akum, kong Oli-i takok mangu. Oli-i parliament anentsü aser November ita election tasen agitsü totuyuba agütsü, aser election magi tashi pa ya caretaker prime minister ka ama alitsü. Oli-i parliament anentsüba atema ken o ter dak tema benoka lir, aser item ken o ya Supreme Court nung Bodhbarnü nungi jembi tenzütsü.

Mali den arrtsü anasa mezüung tenzüka saka iba sülen danga region, talisa linük anüdoklen tonga oa meimchir taum libaliru nung timtem tulu agütsü. June ita tetenzüklen linük north tsütsü aliba Solhan nung lendong tesashi ataloka nisung tajemba agi 138 tepset, aser ibai rara tenzüka sülen azüdokshi tamajungtiba, ta züngshir. Iba lendong nung nisung 160 asü, ta yangji aliba osangtem ajanga ashir. Iba lendong ya ajanga kibong 7,000 dak tema tesem balala nung jenoka alir. 2019 küm nungi linük nung azüdokshi mechi nisung million 1.2 dak tema - nütsüung yongsük 20 nung nisung ka amai - pei ki yutsür tesem balala nung jenoka lir, ta United Nations indang refugee agency ajanga ashir. Taküm kisüung nunga nisung 150,000 shi pei ki yutsür linük telungzük nung tesem balala nung jenshia lir, aser parnok ya shilem 84 bo tetsür aser tanurtem lir, ta agency ajanga June ita tetenzüklen shia liasü. Yimsü asütsü aser par party telungzük nung pa anemertem nungi jenbutsu mechi Oli-i ita tetenzüklen pa indang cabinet nungi minister timba anentsü aser temelen nisung 20 shimtet, shirnok timba coalition partner ka nungi lanirtem lir. Minister tem shimba ya constitution anema lir, kechiaser Oli ya caretaker prime minister ka dang lir, ta Supreme Court judge temi ashi. Court ajanga minister 20 anentsüba ajanga cabinet nung ato kilonser densema züngsem pongu dang anünger. "Ato kilonseri constitution mezüngshie minister tem shim... aser ibaji court-i anentsü," ta petitioner Dinesh Tripathi-i ashi. Tang tashi Oli nungi ola adoka mali, saka pa den yariteper Rajan Bhattarai-ibo court totuyuba sülen sorkar anidaktsü, saka ibai yimtenren tsütsü shidak masü, ta ashi. Nepal nung yimten yimsüsürtem tashi agi raktepba mapang coronavirus maneni prokshia aor, kong iba tashidak tendangba aser mozü agütsüba jenjang kangasa tajemzükba nung lir. Ketdangsürtemi asadangba nung COVID-19 wave tanabuba ya May ita liasü, ta ashir. Mongulbarnü Nepal nung nisung tasen 3,703 dak COVID-19 tashidak ya putet, kong May 12 nü nisung 9,305 dak puteta liasü.

### Taliban-iAfghanindangTajikistanbordercrossingtongtibaagiogo

**Kunduz, Aami/June 23 (Agencies):** Afghanistan aser Tajikistan tsünga arrtsü alema senzüba (border crossing) tesem tongtiba Taliban teloki agiogo aser security forces kar parnok indang post yutsür arrtsü alema jena aor, ta provincial ketdangsür aser mitkar lenirtemi Mongulbarnü ashi. Kunduz yimti nungi kilometer 50 shi pilar Afghanistan north tsütsü Shir Khan Bandar rakzüktetba ya US sepaitem anizüker aoba maparen tatembanga tenzüka mapang May 1 nungi tenzüka Taliban teloki operation tali agia arudang tulutiba ajangzüksetba alitsü. "Tia maka tanep ghonda ka raraba sülen Taliban-i Shir Khan port aser jila aser Tajikistan den arrtsü nung check post amenoka aliba ajunga agiogo," ta Kunduz provincial council nung züngsem Khaliddin Hakmi-i ashi. "Onok check post ajak

yutsür aotsüsa akum ... aser sepai kar arrtsü alema Tajikistan nung oa lir," ta mitkar tanishir kati osangbener dang ashi. "Anepdang tashinung parnok (Taliban telok) tesem ajaklen liasü, parnok noklang aika liasü," ta pai pa tenüung miimshia ashi. Taliban odongtar Zabihullah Mujahid-ia Pyanj River alema arrtsü ajangba tesem agiba indang ashi. "Ozü Mujahideen temi Kunduz nung Tajikistan leni arrtsü alema aoba tesem ajunga aser Shir Khan Bandar amokbanga lir," ta pai ashi. May ita nungi tenzüka Afghanistan nung aliba district 370 nungi 50 dak tema Taliban teloki agiogo, ta UN special envoy on Afghanistan ajanga tekumdangtsü shir lia iba lendong ya ataloker. "Parnoki agir aliba district tem yagi provincial yimtiba tem muketbanga lir, anungji

bendanger sepaitem ajunga omaba sülen parnoki item yimitem agitsü atema parnok renemshiba amai sayur," ta UN Secretary-General indang Special Representative for Afghanistan Deborah Lyons-i UN Security Council dang ashi. Tawa linük north tsütsü Faryab, Balkh aser Kunduz province indang yimtiba asem tezülen Taliban aser Afghan sorkar meyong sepaitem tsünga kanga sashia rara liasü, ta ketdangsürtemi ashir. Taliban ajangzükba aser tanem tanemi anünga aliba US sepai 2,500 nungi 3,500 tsünga aser NATO sepai 7,000 shi anizüker aoba ajanga bilemba dang nungi tali Afghanistan nung raraba tembangtsü atema tali temolung agütsüshitsüsa akumer. Sorkar aser Taliban tsünga Qatar nung jembishinüba nung tang tashi telemtetba tajung ka magiteti arur.

### Hong Kong nung Apple Daily osangkaket tanü tatem angutsü

**Hong Kong, Aami/June 23 (Agencies):** Hong Kong nung democracy busema adokba osangkaket tulutiba, Apple Daily ya shibangtsü osang sangdonggogo, anungji iba yimti nung osang abenba temeden anokshitsür. Mangatetep aliba national security law nung aibelena osang kar adok, ta tai tonglokja iba osangkaket indang office ya taoba hopta mita bushia liasü. Police temi iba osangkaket indang yimo zülur tekolakba den ketdangsür pongu apu aser iba company den sendaktepa aliba rongsen soita ayu. Hong Kong aser China lenirtem aitsüba rongnung iba osangkaket ya tongti ka akum. Apple Daily management ajanga staff tem kumzüka ayutsü mechi ayatirm sülen inyaksangshi anentsü lemtet, ta ashi, anungji Brehostibarnü adok ya tatembang asütsü.

Iba osangkaket shibangba ya Hong Kong nung freedom of expression atema takoksa tulu alitsü, ta UK Foreign Secretary Dominic Raab-i ashi. Küm 26 tejen osangket indang digital version ya ayatirm sülen update masütsü. Iba osangkaket adoker Next Digital ajanga sangdong ka nung tazüngertermi tashi anga busemba aser osangbener, staff aser advertiser tem dang pelaba lemsatepa liasü. Apple Daily tenzüksang Jimmy Lai, shiba mapang talangka nungi Chinese Communist Party anema aru, pa ya ken o aika nung aija tepuokdak yua lir. Taoba Brehostibarnü police 500 shi arua iba osangkaket züluba tesem mita bushi aser par osangtem ajanga yimti nung benoka aliba national

security law nung aibelen, ta ashi. Iba osangkaket ketdangsür apuba ajanga yangji inyaker tsüba akum aser aika idangjisa mapa nungi anen. Iba osangkaket ajanga 2019 küm nungi tenzüka danga linüktem dang Hong Kong aser mainland China anema tenokdangba agüjang ta article 30 dak tema züluogo, ta police temi tai tonglokja lir. Parnoki iba osangkaket indang editor-in-chief aser ano ketdangsür pezü tashi pei kidang nungi apu aser Apple Daily den sendaktepa aliba company asem - Apple Daily Limited, Apple Daily Printing Limited aser AD internet Limited - meyong sen million \$2.3 jenjang rongsen soita ayu. Iba sülen akhi ama hopta ishika inyaksü atema dang sen lir, ta osangkaket ajanga shia liasü.



Ketdangsür kati Lahore, Pakistan nung bomb apokba tesem asadangba noksa nung angur. Bodhbarnü Pakistan anüdoklen Lahore yimti nung nisung aliba tesem ka nung bomb tesashi ka poka nisung kar tasü aser ishika yirua liasü, ta ketdangsürtemi ashi.



## Mon district DPDB senden menogo



**Dimapur, Aami/June 23 (TYO):** DC, Mon Office Conference Hall nung June 23 nü Mon district District Planning and Development Board senden menogo. Senden tetenzüki District Chaplain, asür Rev Takyong Konyak nem akhüm tetushi agüja sarasadema liasü.

MLA & Chairman DBDP Mon, E.E. Pangteang-i, wara wave anaprongla kanga junga azioktetba atema District Task Force for COVID, District Administration aser yakbang nung inyakertem aser healthcare workers tem nem tenüngsang agütsü.

Paisa, DPDB Annual Plan booklet kanga junga asadangtsüla aser küm ka tsünda inyakimtem osang bendenloktsü aser intoktsü alibatem asadanger update asütsüla, ta ashiba den Planning Department dang iba ken o ya kanga tongtibangsa agitsü mepeshi.

LADP 2021-22 dak sendakba nung Mon district nungi MLA temi jongdak mapang amshitsü atema Common Pool nungi sen lakh 50 rizünga yua atatsü telemteba agiogo, ta paisa metetdaksü. State sorkar tetuyuba dak

ajemdaker Sen lakh 50 ya covid dak sendakba nung inyakim balala atema Assembly Constituency tem nem sen lakh 10 (Constituency ajak) lezmükja aliba nung bendenloktsü, ta pai ashi.

### Senden nung sensak asema onüktem rongnung:

1. Ken o benokbatem Board-i agizüka Department tapet dangi abentsü lemtetbatem:

i. Kenchenshu Student's Union züngoksemsü atema

ii. Anghlam Welfare Society Y. Kenchenshu züngoksemsü atema.

iii. Counseling & Prayer Ministry Society, Aboi züngoksemsü atema.

iv. Holy Cross School indang kiojen raksaba temenok agütsü atema züngoksemsü.

v. Chingkao Nyaho Village, Yaphang, Changkhong, Ukha Lamping nung Nagaland Village Guard(NVG) tentetsü atema.

vi. Mon District nung Aspirational Block ama Tobu shimtsü atema.

vii. Yingang School, Aboi züngoksemsü atema.

viii. Wungmei Entertainment and Management, society ama züngoksemsü atema.

ix. United Yonghong Village nung tang amenoka aliba health unit Primary Health Centre (PHC)-i ajungkettsü aser Angjanyang nung amenoka aliba health unit PHC mesera CHC-i ajungkettsü atema.

2. Covid dak sendakba inyakim balala atema District Hospital Mon aser tanga Health Units tem nem fund lezmüksütsü mepeshiba Board-i agizükogo aser item fund ya LADP fund ajanga agütsütsü lemtet.

3. TB MUKT Bharat Campaign: 2025 tashi nungbo TB tashidak samatsütsü atema India sorkar nükjidong aliba aser Government of Nagaland, Principal Secretary, Health and Family Welfare nungi agizükba shiti dak ajemdaker Board-i district nung iba nükjidong atalokdaksütsü atema takok tashi teyari agütsütsü lemtet.

4. Board-i LADP 2021-22 agizüka liasü.

Mon district DPDB senden ya Vice-Chairman DPDB Mon & DC Mon, Thavaseelan K, IAS lenisüba kübok agi. Senden nung 46 AC Mon MLA, N. Thongwang Konyak, board züngsemtem aser Department balala nungi ketdangsürtem dena liasü.

## Kohima DC-i NGO/Charitable Institution tem nem osang agütsü

**Dimapur, Aami/June 23 (TYO):** Kohima Deputy Commissioner, Gregory Thejawalie, NCS-i sangdong ka ajanga, India sorkari jenjang tatakzük ka nung Wheat/jang stocks shishilembadak mela mela shishilembateptsü nükjidong nung 2021-22 küm atema

OMSS (Open Market Sales Scheme) policy liberalize sütsüba, NGOs/Charitable Institutions tem nem metetdaksüogo.

### Jenjang yamai alitsü:

1. Wheat- Rs. 2100/- per qntl, i.e, Rs. 21 per kg.
2. Jang - Rs. 2200/- per qntl, i.e, Rs 22 per kg.

DC-isa tejangrar NGOs/Charitable Institutions temi iba scheme agitsü atema Food Corporation India, Nagaland office den tongteprateptsü ta shiogo.

Directorate of Food & Civil Supplies-i June 19 nü osang agütsüba dak ajemdaker tang iba osang sangdongogo.



Dimapur district, Chumukedima Block kübok Aoyimküm yimtsüng nung tanü tashi nung temsüa alirtem noklang nung noklang nem Covid-19 vaccine mezüngbuba dose agütsüogo. Ajak agi nisung 592 vaccine agiogo.

## Mulungnen O



01.07.1951 ~ 15.06.2021

Onoki teti meima aliba asür obala **Tiameren Kichu**, mapang tatsüka shiranga alidang nungi pa asüba anogo tashi adianutem, kija, medemertem, kiyonger, lokti balala, Arago aser shirnokisa sarasadem ajanga, rongsen, shisatsü aser nübo agi yaria aruogo, nenok ajak dang kanga dang pelaba lemsateper.

Ajak dangi tsüngdong arua iba tepela meshitetba atema sasaa bilemer, saka Tematiba asen Tsüngremi nenok ajak moajangma.

~ **Temeim Kinungtsü, Chirnur, Semchisemnur**  
aser Kinungertem

## Nagaland Angh-i teyari agütsü

**Dimapur, Aami/June 23 (TYO):** Nagaland Angh, R.N. Ravi-i Tuensang district kübok kanga dang kinük nung aliba yimtsüng 10 nem Tuensang Deputy Commissioner office ajanga basic medical kits tem agütsüogo.

Item osettem ya Deputy Commissioner aser DTF mendenbuba, Kumar Ramnikant-i, CKS tir, Nunganglemba Chang matsüngdang DC Office, Tuensang nung June 23 nü lemja liasü. Waoshu, Yimpang aser Taknyu yimtsüng nungi Head GB tem nem osettem DC office nung agütsü aser yimtsüng tenet atema osettsüttem administrative ketdangsürtem nem yimtsüng tonga bener otsütsü atema agütsüogo.

Osettem rongnung oximeter, glucose meter, mozü, mask aser PPE kits amala medical equipment tem densema lir.

District kübok teyari agizükba yimtsüngtem rongnung Losolo, Keyanru, K Longsor, Kephore, Longtuker, Shongkiu, Khonangpong, Taknyu, Yempang aser Waoshu densema lir.

DC aser DTF mendenbuba-i, medical accessories tem ya medical dak sendakba nung jongdak mapang amshitsü atema lir, aser pei tata PHC aser health centre tem kübok staff tem den kanga junga angatetteper ang amshitsü nüngdaker ta ashi.

Kasa mapang nung Village Council tem dang wara pokteter aliba mapang item osettem ajak yimdaklirtem ajangzüksü atema kanga junga anepalua amshitsü metetdaksüogo. Maneni CKS tir-i, Tuensang district kübok kinük nung aliba yimtsüngtem nem Angh-i tenüngdakba medical kits tem agütsüba atema kanga pelaba lemsatepa liasü.

## Kiphire nung Office tekolaktem senden amen



**Dimapur, Aami/June 23 (TYO):** Kiphire nung office tekolaktem ajak, Covid-19 inyakim aser vaccine agütsütsü atema sentong yanglutsü asoshi June 22 nü DPDB conference hall, Kiphire nung senden ka menogo. Iba senden ya Deputy Commissioner, Kiphire, Rahul Mali, IAS lenisüba nung agia liasü.

Deputy Commissioner-i senden nung dena alirtem nem district nung Covid-19 tensa metetdaksüba den vaccine agitsü koda tongtibang iba indang lemsatep. Paisa, iba wara ya ajak longjemer inyakba ajanga koktettsü ta shia züngsemtem dang shilem tajung

agitsü mepeshiba den takokba tashi teyari agütsütsü nangzükba liasü.

DIO, Kiphire, Dr.K. Pewezo Khalo-i, Covid-19 vaccination drive indang osang tatsü agi metetdaksü aser district nung Covid-19 vaccine takok ngua agütsüyonga aotsü atema tasatem lemsatepa liasü. Paisa, line department temi yimtsü kar

adopt süa Covid-19 vaccine dak sendakba nung osang tejangja agütsütsü benokdang aser züngsemtem dang wara dak sendakba ken o tem yimtsüngtem nung benoktsü atema sorkari tetuyuba agütsür aliba achaayangtsü aser asadanga alitsü metetdaksü.

# Olympics asayaba tesemtem nung yi mamshidaktsütsü



July ita nungi tenzüka asayatsü aliba Tokyo 2020 Olympics anemertemi Tokyo Metropolitan Government building kima iba asayamung athitsü khanga longkak aitba noksa nung angur.

**Aami/June 23, 2021 (Agencies):** Olympics tenzüksü anogo 30 anunga lia Tokyo Olympics organizers temi Bodhbarnü Olympics asayaba tesemtem nung yi meyokdaksütsü atema telemtetba agiogo.

2020 küm asayatsü aliba asayamung koba wara poktetba ajanga thinena liasü, iba asayamung ayonga masayatsü atema Japan nungertemi anemaka asayamung

ayongertemi renemdar. Bendanger asayar aser ketdangsürtem Japan nung adenshiba ajanga COVID-19 tashidak tali menatepyonga aotsü, ta Japan nungertemi shisabulua bilemer.

Media osang balala ajanga asayamung ayongertemi Olympic asayaba tesemtem nung yi jemdaksütsü asoshi sentong yangludat ya sangdongba sülen iba anema nüburtemi ola adoka liasü.

"Mongintemi shisatsü agütsüba sülen asayamung ayongertemi venue balala nung yi ajemba aser ayokba nokdaksü telemtetba agiogo," ta Tokyo Olympics tir Seiko Hashimoto-i osangbenertem dang ashiba den sponsor Asahi Breweries-ia, yi mayoktsü atema telemtetba agiba mulunga agizükogo, ta ashi.

Health ketdangsürtemi Olympics asayaba tesem temekettem nung yi ayokba

ajanga nüburtet tali anasabai arudaktsütsü, tashi agi jembiteptsü aser bar tem nung nüburtet aika meyokteptsü aser iba ajanga tashidak menatepyonga aotsü akok, ta ashiba sülen yi mayoktsü atema telemtetba agi.

Kasa mapang nung asayamung ayongertemi asaya reprangtsü atema nüburtet arudaktsütsü atema temelaba agütsütsü asoshi telemtetba agiba pusema jembio.

Asayamung ayongertemi Hombarnü ashiba agi, venue tem nung local tem 10,000 bo arudaktsütsü. Bendangertem nembo tenokdangba agüjatokogo. "Terpranger dena asaya balala ayongzüka asayatsü asoshi tajungtiba renemshitsüji tajungba asütsü ta onoki telemtetba agi," ta Hashimoto-i Mongolbarnü ashi.

"Auh asaya repranger medeni asayaba ajanga tashidak menatepa aoba nungi jenbotsü, saka tanga asayamungtem


nunga tashidak nisung aika dak menatepyonga aoba mali," ta Hashimoto-i ashi.

Organiser temi Bodhbarnü ashiba agi, aonung asaya reprangtsü asoshi nüburtet arudaktsütsü marudaktsütsü iba dak sendakba nung parnoki July 12 nü tashi nung telemtetba ka agütsü. Iba mapang tashi nung Tokyo aser tanga tesem kar nung tenokdangba agütsür aliba agütsü.

Wara pokteter aliba mapang asayamung tekümzüka kübok masayatetsü ta Japan nungertem aikati bilemer.

Kasa mapang nung Ugandan nunger delegate tem rongnung ka dak Japan tonga aruba sülen coronavirus tashidak potetba ajanga asayamung ayongertem atema tetsükdaksü adokogo. Japan-i maru tsüngda tashidak tendangba mapang tashidak meputetba den vaccine-a agir liaka tashidak potetba ajanga tebilemtsü akar.

## All-rounder tem rongnung Jadeja temaba jenjangi tuogo



**Dubai, Aami/June 23 (Agencies):** Bodhbarnü sayaba ICC Men's Test Player Rankings nung South Africa nunger wicketkeeper-batsman Quinton de Kock top 10-i iogo. ICC World Test Championship series nung St Lucia nung West Indies den asaya run 158 agi akokba asaya nung pai run timtiba yangluba sülen pa top 10-i iogo. Iba sayamung South Africa-i 2-0 agi kokogo.

Kasa mapang nung all-rounder tem rongnung taoba West Indies captain Jason Holder point 28 tejemba küma Ravindra Jadeja sülen tanabuba jenjangi asepzüka aluogo. India nunger left-hander shiba 2017 küm August ita sülen tang mezüngbuba No.1 jenjangi tuogo, pai rating point 386 ngutetogo, koba Holder dang nungi point ana agi timba lir.

De Kock-i mezüngbuba innings nung run 96 yangluba sülen pa jenjang ana tejkadangi tua 10buba nung lir. Ita 18 tsüngda pa tang mezüngbuba top 10-i iogo. Arishi küm 28 tain wicketkeeper-batsman shibai

pa indang career nung jenjang trokbuba tashi tongteta lir, pa 2019 küm December ita tatemsa top 10 nung liasü.

Maneni Bodhbarnü sayaba ranking nung SA captain Dean Elgar-a jenjang ka tejkadangi tua jenjang 19buba tongtetogo. Pai run 77 yanglua liasü. Rassie van der Dussen-a jenjang 31 tejkadangi tua 43buba tongtetogo. Pai tanabuba innings nung run 75 yanglua liasü.

South Africa nunger bowler tem rongnung player of the match Kagiso Rabada-i wicket pongu agiba sülen jenjang ka tejkadangi tua jenjang trokbuba tongtetogo aser spinner Keshav Maharaj, shibai tanabuba innings nung küm 61 tsüngda South Africa nunger asayartem rongnungi mezüngbuba Test hat-trick agia liasü, pa jenjang asem tejkadangi tua jenjang 28buba nung lir. Pai iba asaya nung wicket tenet agia liasü. Lungi Ngidi-a jenjang 41buba tongtetogo.

West Indies nunger batsmen tem rongnungi Jermaine Blackwood-i run 49 aser 25 yangluba sülen jenjang 44buba tongtetogo aser Shai Hope (82) aser Kieran Powell (94) nata tejkadangi tuogo.

Fast bowler, Kemar Roach-i wicket tenet agiba sülen pa bowler tem rongnung jenjang 12buba nung lir. Kyle Mayers-i innings anaprongla nung wicket asemsem agiba sülen pa jenjang 51 tejkadangi tua jenjang 53buba tongtetogo.

## Euro 2020: Croatia aser England na round of 16-i iogo

**Aami/June 23, 2021 (Agencies):** Euro 2020 asayamung nung Mongolbarnü Group D asaya nung Croatia-i goal 3-1 agi Scotland koka round of 16-i iogo.

Arishi küm 35 tain Croatia captain Modric-i asaya tenzüker minute 62buba nung goal ka idaktsüba ajanga par telok nem takok agütsüogo. Iba asayamung ya Modric atema tatembangbuba asayamung asütsü. Modric ya Croatia atema European Championship nung goal idaktsürtem rongnung

tanobusang aser tambusang kümogo.

Pai 2008 küm arishi küm 22 asüba mapang Austria den asaya nung goal ka idaktsü aser Mongolbarnü arishi küm 35 nung pai goal ka idaktsüogo.

Croatia atema tanungba goal ana ya winger Nikola Vlasic-i minute 17buba nung aser Ivan Perisic-i minute 77buba nung idakja liasü.

Scotland atema Callum McGregor-i asaya mezüngbuba shilem madem tsüngda goal ka idakja liasü.

Kasa mapang nung Mongolbarnüsa England-i Group D asaya ka nung goal 1-0 agi Czech Republic koka Group D takoker ama parnoka round of 16-i iogo, aser Czech team-a round of 16-i iogo.

Asaya tenzüker minute 16buba nung Sterling-i England atema goal ka idaktsü aser goal ka yagi parnoki asaya akok.

England team taruba asaya Wembley nung France, Germany mesera Portugal den asayatsü aser Czech team-a iba telok nungi takoker den asayatsü.



Taoba mapang Olympic nung medal ngur alila weighlifter Karnam Malleswari, Delhi Sports University Vice Chancellor asütsü shimba sülen Delhi Chief Minister Arvind Kejriwal aser Deputy CM Manish Sisodia nati la den New Delhi ajurutepta noksa nung angur.

### BILEMDANGANG

"Tetsüba agi temaba jenjang metongteter."